

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- प्रदेश च पैहले गेड़ दे चुनां लेई प्रचार अज्ज मुक्की जाग। मतदान 18 सितम्बर गी होग। गृहमंत्री अमित शाह अज्ज चिनाब घाटी च त्रै रैलियां करगंन।
- डोडा, किश्तवाड़ ते रामबन जिले च प्रचार अज्ज संजा मुक्की जाग। इनें असेंबली हल्के लेई 64 मेदवार चुनां मैदान च न।
- अज्ज ईद-ए-मिलाद-उन-नबी दा ध्यार मनाया जा'रदा ऐ। राष्ट्रपति द्रौपदी मुर्मू ते उपराज्यपाल मनोज सिन्हा होरें लोकें गी ईद दी मुबारकबाद दिक्ती ऐ।
- सरकारै घाटी च तैनात जम्मू खित्ते दे सरकारी मलाजमें लेई त्रै विशेष कैजुअल छुट्टिएं दा ऐलान कीता ऐ तां जे ओह असेंबली चुनाएं च वोट पाने दे अपने हक्क दा इस्तेमाल करी सकन।

<><><><><><>

JK Campaign End

जम्मू कश्मीर च पैहले गेड़ दे असेंबली चुनां लेई प्रचार अज्ज मुक्की जाग। प्रदेश दे 7एं जिले दिएं असेंबली सीटें लेई इस म्हीने दी 18 तरीक गी वोट पोआए जांगन। एहूदे च डोडा, किश्तवाड़, रामबन, अनंतनाग, पुलवामा, कुलगाम ते शोपिया जिले शामिल न। एहूदे परैंत दुए गेड़ लेई मतदान 25 सितम्बर गी ते त्रीए गेड़ तैहत पैहली अक्तूबर गी होग। वोटें दी गिनतरी 8 अक्तूबर गी कीती जाग।

<><><><><><>

J&K Amit Shah

शनिवारें डोडा च प्रधानमंत्री हुंदी रैली मगरा बीजेपी दे प्रचार गी बड़ा मता बल थोआ ऐ। आकाशवाणी जम्मू संवाददाता दी रिपोर्ट मूजब बीजेपी दे वरिष्ठ नेता ते केन्द्री गृहमंत्री अमित शाह होर अज्ज रामबन, किश्तवाड़

ते पाङ्डर च त्रै रैलियां करगंन। इत्थें 18 सितम्बर गी पैहले गेड़ तैहत् चुनां होना ऐ। बीजेपी दे प्रवक्ता ते मीडिया केन्द्र दे प्रभारी अरुण कुमार गुप्ता होरें आखेआ जे बीजेपी पिछले 10 बरें च पुट्टी गेदी क्रांतिकारी गैह, विकास ते खुशहाली लेई कीती गेदी कारवाइए दे आधार पर चुनां लड़ा'रदी ऐ।

<><><><><><><><>

Campaign Jammu

जम्मू कश्मीर च होने आले विधानसभा चुनां तैहत् पैहले डोडा खित्ते दी 8 सीटें पर पैहले गेड़ तैहत् 18 सितम्बर गी वोट पाए जाने न। एहदे लेई चुनां प्रचार अज्ज संजा मुक्की जाग। हर इक मेदवार मतदाताएं गी अपने पक्ख च करने दी पूरे जोर कोशश करा'रदा ऐ। बीजेपी इकलौती पार्टी नै जेहदे वरिष्ठ नेता डोडा च रैलियां करने लेई आए। प्रधानमंत्री नरेन्द्र मोदी होरें डोडा च रैली कीती जिसलै कि गृहमंत्री अमित शाह होर अज्ज खित्ते च त्रै रैलियां करगंन। कांग्रेस नेता राहुल गांधी होरें गूल च इक रैली कीती। उंदे अलावा कांग्रेस दे कुसै बी वरिष्ठ नेता नै इत्थुआं दा दौरा नेई कीता ऐ। नैशनल कांफ्रेंस दे उमर अब्दुल्ला होरें डोडा च रैली कीती जिसलै कि डॉत्र फारुक अब्दुल्ला होरें इनें विधानसभा हल्कें दा दौरा बी नेई लाया। पीडीपी दी प्रमुख महबूबा मुफ्ती होरें बी डोडा च चुनां प्रचार नेई कीता। इनें सीटें लेई चुनां प्रचार अज्ज संजा मुक्की जाग। पैहले गेड़ तैहत् 18 सितम्बर गी वोट पाए जाने न। जिने हल्कें च इस गेड़ तैहत् चुनां होना ऐ इंदे च किशतवाड़, पाङ्डर—नागसैनी, इन्द्रवाल, डोडा पच्छम, भद्रवाह बगैरा शामिल न।

<><><><><><><><>

BJP Jammu

केन्द्रीय मंत्री ते जम्मू कश्मीर च चुनाएं सरबंधी प्रभारी जी.किशसन रेड्डी होरें कांग्रेस, नैशनल कांफ्रेंस ते पीडीपी पर कथित तौर पर दोष लाया जे उंदा अजेंडा जम्मू कश्मीर च बंड पोआना ऐ। जिसलै कि बीजेपी दा अजेंडा जम्मू कश्मीर गी बेहतर बनाना ऐ। पत्रकारें कन्नै गल्ल करदे होई रेड्डी होरें आखेआ जे बीजेपी नै जिसलै अपना घोषण पत्र जारी कीता, ओहदे मगरा कुसै गी विरोधी पार्टी कश बोलने आस्तै किश बी नेई रेई गेआ। बीजेपी सबका साथ सबका विकास ते सबका विश्वास दी गरंटी दिंदी ऐ।

<><><><><><><><>

Congress Jammu

साबका केन्द्रीय मंत्री ते कांग्रेस पार्टी दे महासचिव भरत सिंह सोलंकी होरें दावा बन्नेआ ऐ जे कांग्रेस दा गठबंधन गै प्रदेश च अगली सरकार बनाग। उनें आखेआ जे प्रधानमंत्री नरेन्द्र मोदी हुंदे कोल हुन जम्मू कश्मीर दे लोकें लेई किश बी नमां नेई ऐ। सोलंकी होरें आखेआ जे डोडा दे अपने दोरे दरान प्रधानमंत्री होरें गवांडी

जिले किशतवाड़ च टाकरे च शहीद होए दे दऊं जोआनें दे परोआरें प्रति हमदर्दी दा इक लफज नेई आखेआ। सोलंकी होरें इब्बी आखेआ जे जम्मू खित्ते च आतंकवादी गतिविधिएं च बाद्धे दा बी प्रधानमंत्री हुंदे कोल कोई जोआब नेई ऐ हा।

<><><><><><>

NC-Omar

नैशनल कांफ्रेंस दे उप-प्रधान उमर अब्दुल्ला होरें बीजेपी पर दोष लाया जे ओह् औंदे विधानसभा चुनाएं च नमें मेदवारें दा समर्थन करियै उंदी पार्टी, गी कमजोर करने दी कोशश करा'रदी ऐ। दक्खनी कश्मीर दे पुलवामा जिले च इक रैली गी संबोधत करदे होई उनें आचोआ जे दफा 370 ते 35ए गी 2019 च हटाने मगरा बीजेपी नै नमें चेहरें गी आनने ते उनेंगी बढ़ावा देने दी केई सारियां कोशशां कीतियां पर ओह् अपने सारे जतनें च नाकाम रेई। उमर होरें आखेआ जे बीजेपी नैशनल कांफ्रेंस गी कमजोर करने दी कोशश करा'रदी ऐ पर लोक उंदी पार्टी कन्ने खड़ोते दे न।

<><><><><><>

ते हुन बाकि दिएं खबरें कन्ने विजय बजाज।

<><><><><><>

Eid

प्रोफेट मोहम्मद हुंदा जश्न ध्याड़ा ई-ए-मिलाद-उन-नबी अज्ज मुख् भरै च धार्मिक श्रद्धा ते उत्साह् कन्ने मनाया जा'रदा ऐ। इस मौके पर विशेष "मिलाद महफलां" ते "सीरत सम्मेल" लोआए जा'रदे न, जित्थे प्रोफेट मोहम्मद हुंदे जीवन ते सिक्खियाएं पर लोह् पाई जंदी ऐ। इस मौके विशेष मीलाद जलूस बी कड्डे जंदे न।

राश्ट्रपति द्रौपदी मुर्मू होरें ईद मिलाद उन नबी दे मौके पर देशवासिएं, टकोह्दा करियै मुसलिम समुदाय दे लोकें गी ममारकबाद ते शुभकामनां दित्तियां न। अपने सनेए च राश्ट्रपति होरें आखेआ जे प्रोफेट मोहम्मद होरें सब्बनें गी आपू'चै प्रेम, सद्भाव, भाईचारे ते समाजी बरोबरी लेई प्रेरत कीता। द्रौपदी मुर्मू होरें लोकें गी आखेआ जे पैगम्बर मोहम्मद हुंदिएं सिक्खियाएं गी अपनादे होई इक इमानदार समाज बनाने दा पक्का धेइया करन।

<><><><><><>

J&K Casual Leave

सरकारै कश्मीर घाटी च तैनात जम्मू खित्ते दे मलाजमें दे हक्कै च त्रऊं दिनें दी विशेष कैजुअल छुट्टी मंजूर कीती ऐ तां जे ओह त्रऊं गेडें च होने जा'रदे असैंबली चुनां च मतदान करी सकन। इस सरबंघै च आम प्रशासनिक विभाग जीएडी नै हुक्म जारी करी दित्ता ऐ। एह्दे शा पैहले घाटी च तैनात कश्मीरी विस्थापत मलाजमें लेई बी छुट्टी दा ऐलान कीता गेआ हा तां जे ओह अपने सरबंधत मतदान केन्द्रें पर जाइयै वोट पाने दे हक्कै दा इस्तेमाल करन।

<><><><><><>श

SVEEP Udhampur(byte)

उधमपुर दियां जिला चुनां अधिकारी सलोनी राय होरें कल स्वीप गतिविधिएं तैहूत डोगरी गीत "वोट सारे पाना" जारी कीता ऐ। इसी प्रीमता राजपूत नै गाया ऐ ते तमन्ना राजपूत नै गीत गी तैआर कीता ऐ। एह्दा मकसद मतदाताएं गी लोकतांत्रिक प्रक्रिया च हिस्सा लैने लेई प्रेरित करना ऐ। जिला चुनां अधिकारी होरें इंदी सराहना कीती।

<><><><><><>

JK Encounter

जम्मू खित्ते दे पुंछ ते कटुआ जिलें च कल सुरक्षाबलें बश्कार दऊं टाकरे होए। आकाशवाणी दे जम्मू संवाददाता मूजब कल दपैहरी मगरा कटुआ जिले दे बनी इलाके दे दूर-दरेडे ग्रां नुकनाली नाला कश आतंकवादिएं पुलस दे तपाशी दल पर गोलीबारी कीती। पुलसै दे जुआनें बी तुरत परते आली कारवाई कीती ते किश चिरै तोड़ी दपक्खी गोलीबारी जारी रेई। पुलसै दे इक वरिष्ठ अधिकारी नै दस्सेआ जे इलाके च 2 शा 3 आतंकवादिएं दे छप्पे दे होने दी शैका ऐ। उआं सुरक्षाबलें उनेंगी अपने घेरे च लेई लेदा ऐ। इलाके च बाद्ध बलें गी बी भेतेआ गेआ ऐ। तोआई पुंछ जिले च मेंढर सब-डिवीजन दे गुरसाई टॉप दे नेडे बी आतंकवादिएं ते सुरक्षाबलें बश्कार टाकरा होआ। पुलसै मूजब टाकरे आली थाहरे कश खून दे नशान दिक्खे गे न ते इआं लगदा ऐ जे आतंकवादिएं चा इक जख्मी होई गेदा ऐ। इलाके च सुरक्षाबलें दा तपाशी अभियान जारी ऐ।

<><><><><><>

NCC Cadets

जम्मू कश्मीर ते लद्दाख एनसीसी निदेशालय दे अतिरिक्त महानिदेशक आर.के.सचदेवा होरें दिल्ली च थल सैनिक कैंप च हिस्सा लैने आले एनसीसी कैडेटें दिएं शानदार उपलब्धिएं दी सराहना कीती। नगरोटा च स्थित एनसीसी ट्रेनिंग अकैडमी च लोआए गेदे समारोह च मेजर जनरल सचदेवा होरें एनसीसी कैडेटें दी शानदार कारकरदगी दी सराहना कीती। कुड़िं दे दस्ते नै बक्ख-बक्ख मकाबलें च चांदी ते कैह दे तगमे जित्तेन

जिसलै के जागतें दे दस्तें बक्ख-बक्ख मकाबलें च कैह दे तगमे अपने नां कीते न। मेजर जनरल होरें दस्तें दे कमांडर कैप्टन शिवानी शर्मा, फर्स्ट आफिसर कंवर सिंह ते सरबंधत अमले दे जतनें ते मेहनत दी बी सराहना कीती।

<><><><><><>

Meeting G&B

फौज आस्सेआ पुंछ जिले दे फ़ैसलाबाद इलाके दे मकामी बसनीकें कन्नै बैठक दा सरिस्ता कीता जेहदा मकसद फौज ते लोकें बश्कार तालमेल ते सैहयोग गी होर बधाना हा। फौज आस्सेआ इस मौके मकामी लोकें ते दूर दरेड़े इलाकें च आतंकवाद दे खात्मे लेई कीते जा'रदे जतनें बारे अवगत करोआया गोआ। इस बैठक राएं ग्रां दे लोकें गी अपने मसले हल करोआने दा इक मंच बी हासल होआ ऐ।

<><><><><><>

World Ozone Day

अज्ज अंतर्राष्ट्रीय ओजोन परत संरक्षण सरबंधी दिन मनाया जा'रदा ऐ। हर ब'रे 16 सितम्बर गी एह दिन मनाया जंदा ऐ। बक्ख-बक्ख गैसे दी एह मलायम परत धरती गी सूर्य दी हानिकारक किरणें थमां बचांदी ऐ। जेहदे करी इस गृह पर जीवन दे संरक्षण च मदद थहोंदी ऐ। मन्नेआ जंदा ऐ जे आम तौर पर इस्तेमाल होने आले केई सारे रसैनी पदार्थ ओजोन परत गी बड़ा मता नुक्सान पजाई कादे न। इस ब'रे ओजोन दिवस दा विशे सार ऐ मौंट्रियल प्रोटोकॉल-जलवायु दे क्षेत्र च अगगे बधदे कदम।

<><><><><><>